

DEO OPTIMO MAX. QUÆSTIO MEDICA,

QUODLIBETARIIS DISPUTATIONIBUS
manè discutienda, in Scholis Medicorum, die Jovis vigesima - prima
mensis Januarii, Anno Domini M. DCC. LI.

M. JACOBO-LUDOVICO ALLEAUME,
Doctore Medico, Præside.

An idem sudoris, & perspirationis organum?

I.



ICROCOSMI fabricæ & conservationi ita consuluit summa creatoris providentia, ut hunc innumeris diversæ speciei locupletatum miremur organis, quorum indefinente motu, secretionumque, & excretionum beneficio, pro re natâ, & proprio molimine, salutifera non minùs retinet, & assimilât natura, quàm nociva repellit, & amandat. Motus ille, vitæ fons vel vita: sed quo motu vivit corpus, eodem brevi periret, nisi detrimenta quæ quolibet instanti patitur, resarciret analogus latex sero simul & lymphâ constatus, quem proximam nutritionis materiem, humidum radicale meritò dixeris. Ne credas tamen succum hunc nutritium variis secretionibus elaboratissimum licet, corpori nutriendo totum impendi: ita tunc in immensum cresceret fluidorum moles, ut tanto oneri sustinendo impar corpus concideret protinus oppressum. Providam ergò aspice naturam: mille corpori assignavit emissaria, quibus foras protruditur feri maxima pars pluribus olei, terræ, saliumque ramentis onusta. Hæc inter primas occupat Cutis, quam per omne punctum, dum viget sanitas, sub insensibilis perspirationis nomine, rosçidus perpetuò, sed occultè permeat humor. Præcipuum est sanitatis præsidium insensibilis perspiratio, sed levi de causâ ipsius turbatur æquabilitas. Si adaugeatur partium calor, sanguinisque accrescat motus, vividius ad cutem trudentur humores, vasa distendentur, tenuissimis miscebuntur crassiora, copiosiorque accedet perspirabilis materies, quæ vi plurimum auctâ, in exhalantes tubulos irruens, non insensibilem perspirationem, sed effusum sudorem constituet.

I I.

HÆC, à Medicis, per excretionem actio corporis intelligitur, quâ superfluum quid foras eliminat natura. Duplex ab ipsis recensetur eliminanda materies, fluida hæc, illa solida: solidam putâ feces alvinas: quicumque per diversâ corporis ostia relegantur humores, fluidæ vocantur excretiones. Nullus excernitur humor, quin fuerit antea secretus. Quanta sit humorum diversitas vix noverit natura: arcanorum sagacissimus indagator, quoslibet tamen à sanguine veluti fonte uberissimo manare constat. Protrusus à corde sanguis, postquam majora celeri motu percucurrit vasa, minores meandros, & organa penetrat; sed non nisi flexuose secretionum organa subintrant arteriæ: illarum extrema in spiras modò, modò in plicas, nunc in angulos acutos, obtusos nunc conformata, horum texturam subeunt, & mirum dictu! Quàm serpat ibi, ludat, morulas patitur sanguis. Hos ergò anfractus & gyros, secretionum jure dixeris theatrum, vasorumque meatus & poros pro genuino habes secretionis organo. Pro determinatis partium discernendarum mole, pororumque fecernentium diametro, quicumque figurâ donentur subtiliores humorum particule, oblatos sibi canaliculos &

A

meatus, iteratis continuæ pressiois motibus ingrediuntur, dum crassiores iisdem haud accommodatæ porulis, per patentia venarum oscula ulteriùs propelluntur; sic pro variâ sanguinis velocitate, diversâ secretiorum diametro, dispari liquidorum mole, hic, vel ille secernitur humor, lixiviosus in renibus, in hepate sulphureus, limpidus in pancreate, in mammis pinguis, albus, alibilis, in cute salus, qui pro motû gradu, sub sudoris nunc, nunc perspirationis insensilis formâ per ejusdem spiracula excernitur. In eodem homine non eadem est semper posterioris hujusce excretionis quantitas: hanc varietatem ab organi diversitate ne repetas, velociùs tardiùsve protrusi sanguinis opus est. Per quietem flaccescunt muscoli, sanguinem blandè premunt arteriæ, placido motu feruntur liquida, parciùs ad partes appellit sanguis, moderatîsque motibus exercentur secretionum organa, hinc modica hæc excretio, sensibus non obvia. Adaucto motu, vividiori musculorum contractione, majori viscerum succussu, fortiori vasorum compressione, celerius urgentur liquida, abundantius ad partes allabitur sanguis, secretio nascitur uberior, & quasi depluit excretio. Nec ad diversitatem organi confugiet, qui sudorem nihil aliud esse, quàm auctam perspirationem, attenderit.

I I I.

TRIPlici constat laminâ sudoris, insensilisque perspirationis emunctorium cutis: epidermide, corpore reticulari, & corio seu cute propriè dictâ. Tota squamosa est epidermis: obliquè squamas inter ejusce tenuitatis expanduntur exhalantes tubuli, ut in unius grani fabuli spatio 125000 observari posse asserat Leeuwenhoeckius. Spirali-bus sulcis in digitorum apice plurimùm conspicuis instruitur, quibus & hærentia in medio perspirantia vasa, & sitæ in utroque sulcorum latere nervæ papillæ prote-guntur. Ab expanso ex nonnullis auctoribus nervorum involucri, reticulare Malpi-ghii formatur corpus, quod mille foraminulis ubique pervium, nerveas transmittit pa-pillas, vasisque cujuslibet generis exitum præbet. Cutis tandem propriè dicta, quam à densitate corium vocant, sanguiferis, nerveisque canalibus innumeris insignitur, ex quibus mirè complexis infiniti propemodùm ad epidermidem usque assurgunt ramuli, qui excretorii cutis tubuli nuncupantur. Viâ per hosce tubulos liberâ, insensili perspi-rationis vapore madet epidermis: licèt sub calente cælo aspectabilis non sit hæc ex-halatio, facillimè tamen sensibus obvia redditur: in vas longi colli. nitidissimum sanus homo brachium immittat, ad latera vitri intrâ horæ quadrantem guttatim decidet limpidissimus liquor. Si insensilis perspirationis secernendæ munus arteriis per cutem re-pentibus tribuant omnes ferè Medici, nullaque sit apud auctores de secretorio ipsius organo controversia, de organo sudoris dissentiant plurimùm. In glandulis subcutaneis sudorem secerni contendunt quidam, plures unicum & sudoris & perspirationis insen-silis secretorium in extremis arteriis cutaneis esse reponendum asserunt. Prioris senten-tiæ propugnator Steno huic opinioni eò firmiùs adhæret, quòd in cute suam singulis poris subjacentem glandulam se observasse testetur; temerè tamen non credendum: ce-dit demonstrationibus Medicis, cautè systematibus adhæret. Si tot glandulas obtinet cutis, quâ artè tot perspicacissimorum Anatomistarum oculos fugere potuerunt? (a) *Cutis exactè à pinguedine subjellâ separetur, nulla glandula neque in superficia pinguedinis, ne-que in inferiori cutis facie conspicuntur.* Concedantur quædam: quis illas uberimæ su-doris excretioni impares & ineptas non agnoverit? Eadem ergò exhalant, sudantque vasa, & pro majori impetu, vel relaxatione, qui insensilis erat duntaxat aqueus vapor, interdùm quasi agmine factò, in aquæ guttulas, largioresque sudoris rivulos coibit ac-cumulatus.

I V.

SUB epidermide variis in partibus, in palpebris, naso, auribus, areolis mamillarum, sub alis, in penis & scroti cute, circâ anum, mulierumque pudenda, corpuscula sphæroidea ductulo quasi excretorio donata, nonnunquàm conspici fatebimur ultrò: in omnibus, nec in eodem numero, nec ejusdem observantur magnitudinis; sunt quibus

(a) Hist. comp. Anat. de Gland. spe- ciat. p. 35. n. 396.

hiscæ corpusculis referuntur nasus & palpebræ, paucissima reperiuntur in nonnullis, in aliis desiderantur omnino. In hiscæ sphaerulis sebacearum glandularum nomine decoratis Achilleum sui systematis argumentum reponunt qui diversum sudoris, insensibilisquæ perspirationis affirmant organum: sed quàm decipi, & decipere amant, monstrat auctoritas, evincit ratio. Certiora Medicinæ lumina adeamus, Ruischium, Boerhaavium, Vercellonium, Bianchum, Hallerum: apud omnes, & inconcussum manet nihil aliud esse glandulas sebaceas, quàm ductulos excretorios ab arteriis prodeuntes, & idem esse sudoris, insensibilisquæ perspirationis secretorium, dilucidè declaratur. Glandulæ sebaceæ à Ruischio, & Boerhaavio, folliculi, cryptæ, cutanea receptacula nominantur. Meras esse arteriolarum extremitates in folliculos expanse asserit Vercellonius, judicatque Bianchus nec existere glandulas cutaneas, nec esse ad secretionem in cute necessarias. (a) Cum eadem esse vasa sudoris & perspirationis merito persuadeamur, intelligitur, mediocri incitatione motus perspirabile copiosius expelli; majori verò motu, & perspirabile, & cum eo sudorem succedere. Nec minùs luculenter his verbis suam aperit sententiam appellatus jam illusterrimus Boerhaavius: (b) *Ab arteriis subcutaneis ramuli innumerales dispersi, intertextique emittunt vascula subtilissima exvorsum patentia quæ in sanitate vaporem tenuem, volatilem, odorum, salsum, invisibilem emittunt sub epidermide balantem: laxatis verò his fistulis, aut humoribus nimium agitat, formâ sudoris exir.* Sed cur ad auctoritatem confugimus, ubi sudorem nihil aliud esse, quàm auctam perspirationem declarat ratio? Nonne idèd duntaxat propositionis nostræ veritatem negant aduersarii, quòd perspirationem ab arteriis, sudorem à glandulis cutaneis secerni propugnent? Si ergò partes in medium proferre valeamus quæ hujusmodi glandulas omnino expertes, sudore tamen diffuant, certissima apud omnes manebit assertio: sed, ut cæteras corporis partes silentio prætermittamus quæ in homine sano hiscæ corpusculis sepius orbantur, subtiliori scalpello volam manùs, pedisque plantam accuratissimè dissecam: nulla certè patebit glandula, nullam intueberis; quotidie tamen sudorem quasi depluentem eructant vasa manùs, pedisque planta. Non minùs igitur sudor, quàm insensibilis perspiratio, ab arteriis secernitur: sudorem ergò nihil aliud esse quàm auctam perspirationem concedant vel inviti. Sphaeroidea deinde corpuscula, ubi reperiuntur, examini subijce, quid deteget observatio? Ductuli apparebunt excretorii, vel à densitate cuticulæ, vel à materiei contentæ crassitie obstructi: contentam, stagnantemque materiam sebaceam digitis exprime: concidet pars, totumque disparebit tuberculum. Quis genuinas his caracteribus & signis glandulas jure indicaverit? Nonne tandè docet anatome partes, & vasa, humidi distendentis, lubricantisque defectu, collabi, subsidere, obliterari nonnunquam? Si ergò non idem sit sudoris, insensibilisquæ perspirationis secretorium, quid fiet de vasis perspiratoriis, ubi largioribus, diuturnisque sudoribus perfunderetur corpus? Viatores sequere, qui (c) vel tropicum superarunt ad æquatorem vergentes, (d) vel in Jamaica asportantur: hi sudorem maximis guttis stillantem per novem menses experiuntur, indefinenter illi. In adversariorum systemate, affluenter erumpente perpetuò sudore, comprimantur semper vasa perspiratoria necesse est, exsiccantur, fiant inutilia, obliterentur; quis experientiæ tam aliena somniabit?

(a) Hall. de
Persp. sanct.
p. 611.

(b) Desfont.
Cutis. p. 221.
n.º 420.

(c) Phil.
trans. n.º. 37.
(d) Ibid. n.º.
27.

V.

STET ergò verum idem esse secretorium sudoris, insensibilisquæ perspirationis organum: per universum corpus mille rivulis diffunditur sanguis, vigente hujus circuitu, diversi quos complectitur humores indefinenter à centro ad circumferentiam propelluntur. Intereà intestino ipsius sanguinis motu, calore nativo, partium elatere, vi cordis systalticâ, compressivâ vasorum virtute, singularumque robore fibrarum, assiduè conteruntur fluida, ad secretionem disponuntur, sicque eorum dividitur superflua pars, ut minoribus subeundis meatibus, porulisque facta par & habilis, pro motû gradu per exhalantes cutis tubulos, vel sub perspirationis insensibilis, vel sub sudoris formâ excernatur. Remisso cordis & arteriarum motu, suas lentè semitas perrepat sanguis,

blandior succedit vasorum elater, intestinus remittitur & ipse sanguinis motus, fluidorum minùs atteruntur particulæ, minori copiâ ad secretoria cutis appellit secernenda materies, secretoriorum parietes pro sanguinis accedentis quantitate distenduntur, eâque tantùm proportionem hiant poruli, quæ fluidi respondet particulis. Hos ergò medioeri copiâ subito serofus latex excernendus, hinc sola insensibilis perspiratio. Nunc quâcumque de causâ cordis intendatur & arteriarum elater, intestinus subito crescit sanguinis motus, validiùs à fluidis pulsi vasorum parietes, validiùs pariter fluida repellunt, major sequitur molecularum attritus, copiosior secernenda materies ad secretoria perspirationis accedit, solito plus organa distenduntur, uberior secernitur perspiratorius latex, qui pro auctâ mole, per ipsosmet perspirationis tubulos non insensibilis jam, sed sub sudoris formâ erumpit. Obijcient sanè glandularum cutanearum fautores crassiores esse sudoris materiem, quæ per angustiora perspirationis vascula valeat excerni. Majorem, pro instanti, sudoris concedamus quàm perspirationis crassitiem: quid assequuntur glandulæ? Nonne crassiori sudore sæpiùs perfunduntur pedes? Nullas tamen, cuiuscumque sint generis glandulas obtinent. Quancumque sit ergò sudoris crassities è glandulis non excernetur. Sed quàm vana sit adversariorum objectio, hoc unicum evincet argumentum: mukum è naribus prodeuntem fileamus, qui sudore viscidior in membranâ *Skyeiderianâ* secernitur, hanc tamen nullis hucusque glandulis refertam observarunt Anatomistæ. Cur audaucto motu, per exhalantes tubulos non excerneretur sudor quantumvis crassus? Cum tantâ vi nonnunquam extrorsum urgeantur arteriæ, exhalantiaque dilatentur vasa, ut & ipse erumpat sanguis, testem appellemus experientiam, libros aperiamus: Amstelædami mulierem vidit Boerhaavius, cui per capitis poros saliebat menstruus sanguis. Mulieris Amstelædamensis menses per totius corporis cutem exsudasse scribit Rußchius; coloratique manarunt sudores, referente Bartholino, quos pro vino rubro habuerunt nonnulli. Cum ergò pro intensiori motûs gradu per arterias cutaneas perspirabilemque poros excernatur nonnunquam & ipse sanguis, cur ab iisdem non manaret tenuior sanguine sudor? Demonstravimus insuper sudorem nihil aliud esse quàm insensilem auctam perspirationem. Auctoritatibus ergò freti, ductique ratione, quid nos concludere vetat?

Ergò idem sudoris & perspirationis organum.

DOMINI DOCTORES DISPUTATURI.

<i>M. Franciscus Nicolaus Gantier.</i>	<i>M. Ludovicus Renatus Marteau.</i>	<i>M. Franciscus Pouffe.</i>
<i>M. Franciscus Bidault.</i>	<i>M. Josephus Lallemand.</i>	<i>M. Thomas-Bernardus Bertrand.</i>
<i>M. Joannes-Claudius Munier,</i> <i>Consiliarius Medicus Regis ordinarius & domus Regie Invalidorum.</i>	<i>M. Petrus Poissonnier, Professor</i> <i>& Censor Regius.</i>	<i>M. Camillus Falconet, Salubris</i> <i>Consilii Regii Socius, & d</i> <i>Regiâ Numismatum Academiâ.</i>

Proponebat Parisiis CLAUDIUS-JOSEPHUS GENTIL, Bisuntinensis, Saluberrimæ
Facultatis Medicinæ Parisiensis Baccalaureus, A. R. S. H. 1751,
A SEXTA AD MERIDIEM.

Typis QUILLAU, Universitatis & Facultatis Medicinæ Typographi, 1751.